

B. N. C  
FIRENZE

1068

17

1068.17



# DISSERTATIO EPISTOLARIS

De Glandulis Conglobatis Duræ Me-  
ningis Humanæ, indeque Ortis  
Lymphaticis & Niam Me-  
ningem productis.

LVCÆ SCHROKIO  
UIRO CLARISSIMO

*Cesareo-Leopoldina Naturæ Curiosorum  
Academia Præsidi &c.*

ANTONIUS PACCHIONUS

R E G I E N S I S,

Phyficus Romanus


S. P.



ROMÆ, Typis Io: Francisci Buagni. 1705.

*Superiorum Facultate.*





(3)  
P R Æ S E S  
AMPLISSIME.



N denuò in publicum pro-  
dire me conspicis , Orna-  
tissime LUCA SCHRO-  
KI ; cumque de ijs , quæ  
anteà pollicitus fueram , in præsentì  
Epistola nec verbum reddam , facile  
me vel Eruditis imponere , vel pro-  
missis non stare , tecum statueres , nisi  
meis literis per Dn: Mayrium , Medi-  
cum Salisburgensem Celeberrimum ,  
ad Te transmissis , certior factus esses ,  
me novis sectionibus , & accurata  
investigandi methodo Duram Me-  
ningem ità persequi , ut nihil ea in  
parte intactum velim ; sed in futura  
editione Opus , ut ajunt , omni nu-  
mero absolutum , saltem pro viri-  
bus , habeatur . Hoc sanè , ut cò-

A 2                      prom.

(4)

promptius præstarem, cum vix Meningis Iconismum iterum ad finem perduxerim, mecum proposueram sylvam anatomicam, & physico-medica, in tractatu de Dura Meninge, jam antea prælo consignatam, in distinctas digerere propositiones, atque explanare: dumque id ipsum aggredi meditabar, videbar votis non planè satisfecisse, nisi humoris scatebram perquirerem, qua cadaveris cujuslibet Cerebrum, & Meninges perpetuò maderè observantur. At quamvis id mei muneris maximam partem esse arbitrarer; qui Duræ Meningis perlustrandæ Provinciam susceperam; plura tamen maximè momenti repagula ab hoc tentamine animum prohibebant.

Primum erat, quòd Clarissimus Antonius Nuckius amico roganti, *Utrùm in cerebro etiam occurrant vasa lymphatica*, responderit illorum liberalitatem reprehendendo, qui talia levi negotio admitterent: accedit,

dit , quòd idem Auctor Insignis ,  
& in glandularum illustratione se-  
dulus , ingenuè fateatur , se nunquam  
hac in parte scopum attingere po-  
tuisse .

Obstabat Inclyti Malpighij de hac  
Meninge silentium , cujus nunquam  
satis laudata solertia , præcipuas Ab-  
dominis , & Thoracis membranas  
glandulis contextas detexerat .

Obstabat tandem ipsa Meningis  
textura , quam cum densam adeò ,  
fibrisque validis omni ex parte con-  
cinnatam , ac veluti muscularem de-  
prehendissem , spatium nec videram ,  
nec concipere poteram glandulis in-  
cludendis aptum , & capax . Cum ,  
hæc inter , scrupulos omnes ademit  
cultus anatomicus , quem , dum at-  
tentè , in perlustranda interiori Sinuum  
fabrica , adhiberem , non potui non  
mirari , summam inspiciens Menin-  
gis crassitiem circà Sinum Longitudi-  
nalem ; cujus ideò sectione statim  
incepta , & paulò profundius in ip-



fius cavitatis lateribus instituta, in corpora quædam globosa incidi, quæ glandulas esse, ulteriori investigatione, certior factus sum; quarum seriem antequam aperiā, patere, Vir Amplissime, ut in Sinuum descriptione paululū immorer; cum hæc dicendis usibus non parū lucis sit latura.

Interiorem Sinuum cavitatem, quamvis non delineaverit, accuratissimè tamen descripsit Famigeratissimus Vvillisius, cui in plurimis assentiri necesse est: illos attamen intimiùs examinando, constat, cum sagacissimo Vieussenio, tres majores Sinus (quos tantū rimari hìc necessarium putavi) structura nonnihil invicem differre; laterales enim simplices esse videntur Sinu altero, seu Longitudinali: hic (à Vvillisio meritò Primus appellatus) in superna parte cultro leniter diductus interiorem ostendit faciem, primò membranosis, & inæqualibus obductam ex-  
pan-

panfionibus, quæ ita extenduntur, vt ab apice Sinus ad sex ferè tranfverfos digitos descendendo, in minutas cellulas efformentur.

Hæ Cellulæ ab exposito fitu ad verticem usque, uberiores, atque magis amplæ perfpiciuntur, & inæqualiter hinc inde locantur; ipsarum plurimæ vacuæ sunt, habentque orificia in oppositas quasi partes hiantia; Membrana circumteguntur, quæ est instar valvulæ semilunaris, totam tamen cavitatem non occludentis; reliquæ verò foveolas tantummodò impervias repræsentant. *Vide Figuram secundam.*

Cellulæ, quæ ad præfati Sinus longitudinalis latera consistæ sunt, sanguifera excipiunt, ut patet ex horum turgentia, immisso flatu, vel stylo: hæ fabrefactæ videntur, ne sanguis à Sinu tam facilè in vasa remeet; quod constat ex eo, quòd in ampliori, ac declivi eiusdem fitu, ubi sanguis proprio etiam pondere promptiùs ruit,

nullæ reperiuntur valvulæ. Postrema autem Sinus pars, inæqualibus solis membranaceis expansionibus, velut tot fimbrijs, ut plurimum contenta est. *Ut ex Figura prima liquet.*

Vbi sanè observandum, expansionem hanc membranaceam non modò validam esse, sed & Sinus cavitatem non rectà transversim, verùm obliquè ferè semper obducere, eique tenacissimè adhærere.

Sub hoc involucro sitæ sunt chordæ ligamentosæ Villisianæ, quæ à centro cavitatis dicti Sinus propagatæ, obliquè fursùm ducuntur, indè in rete quoddam implicari cernuntur, quo reliquum fistulæ cavum occupant. Eadem profectò chordæ à Falcis Mefforiæ lacertis (quorum dorso maxima ex parte accumbunt, ac nectuntur) plures mutuuntur fibras, unde vires ad proprios vsus intendere possunt. Chordarum specimen habetur *ex Figura prima.*

Venarum innumeros furculos, &  
arte-

arteriarum aliquot, vtrunque in Sinum hunc longitudinalem inferi, cum Vieussenio, adnotavimus; quod non sine aliquo naturæ mysterio evenire, inferius manifestum fiet.

Sinum lateralium cavitas non tot anfractibus, & cellulis distincta est, sed membranacea expansione tantum æqualis cernitur, & ad summum levibus quibusdam plicis signari solet, parum iis absimilibus, quas in Primi Sinus extremitate reperiri indicavimus.

Detracto hoc velamine (quod sic Sinus jam per longum sectos diligenter ab invicem distrahendo) in conspectum veniunt chordulæ, superius adnotatis simpliciores, quæ se mutuò decussantes, ab uno ad alterum extremum exporriguntur: quapropter non solum Sinuum contractionibus, verum etiam vtriusque Interseptorum laminæ firmandæ eas non parum conferre arbitramur. *Vid. Figuram primam.*

Per-

Perpauca sanguifera in hos canales laterales (saltem donec Intersepta attingunt) subintrant; unde hoc ipsorum spatium Primi, & Quarti Sinus divérticulum potiùs esse videtur. Sed ea hìc leuiter tantùm delibasse sufficiat, quæ aliàs, si Deus dederit, ex professo erunt fusiùs exponenda.

Haftenus, Vir Doctissime, aliorum experimenta exhibui; nunc ad ea venio, quæ propriis conatibus è naturæ penu extrahere potui.

In Longitudinali Sinu, immediatè sub membranosis expansionibus, in areolis chordarum Vvillissianarum, quin & supra easdem chordas consistunt innumeræ glandulæ conglobatæ, propria, & tenuissima membrana, veluti in sacculo conclusæ; quæ racematim ut plurimùm coeunt; rarò sparsim disponuntur: hæ glandulæ utrinque ad latera Falcis Messoriæ, ab ejusdem apice ad basis vsque posticam partem miro propemodum artificio procedentes, dorso lacertorum  
accum-

accumbunt, & partim ab horum fibris, partim ab jis, quæ à chordinis emergunt, firmantur, atque invicem alligantur, ita ut nonnisi laceratæ acui disjungi possint. *Vid. iconism. primum.*

Figuram exhibent subrotundam, quæ ex mutua ipsarum compressione identidem variat: in non maceratis Meningibus; ovorum instar bombycinorum apparent: si verò crassa Meninx, aqua communi prius deterfa, per mensem, & ultrà in aceto detineatur (quod sæpiùs innovandum ne foetcat) hujusmodi glandulæ adeò cum ipsa Meninge intumescunt, ut granum milii crassioris à cortice non denudati exæquent, & quandoque superent: in Senibus tamen, & longo morbo confectis ita conspicuæ emergunt, ut sine macerationis, vel microscopii opera discernantur, non solum in interiori parte Sinus prominentes, sed & in lacertorum interstitiis, quæ Piam Meningem respiciunt, & attia-

tingunt ; ut, si membranarum divulsio-  
nem leniter instituas, harum glandu-  
larum plurimæ, Piæ Meningi adhæ-  
rentes adhuc persistant.

Fibris carneis tenuissimis circum-  
ambiuntur singulæ, undè colorem  
carneo-pallidulum nancisci videntur:  
in Senibus verò, in quibus hujusmodi  
fibræ enervatæ nimis laxantur, & fer-  
mè disparent, glandulæ albescentes,  
& magis turgidæ cernuntur: quod, &  
in hydrocephalicis, comatosis, & id  
genus alijs observari posse arbitrarer.

Arteriolas habent à ramulis per in-  
teriolem Duræ Meningis superficiem,  
non longè à falce, reptantibus; qua-  
rum nonnullas à Pia Meninge deri-  
vatas, & à venis ad Sinum tendentibus  
non multum distantes, & quandoque  
associatas accipiunt.

Mirum, & æquè animadversione  
dignum est, hæc glandulas ad solius  
Longitudinalis Sinus latera reperiri;  
cum in lateralibus Sinubus, vel nun-  
quam, vel rarò admodum perpauca ea,  
run-

rundem vestigia adnotentur, ubi præfertim præfati canales deorsum inclinare incipiunt, antequam ab Interseptorum dorso discedant.

Perspecta insuper totius plani, & laterum Interseptorum densitate, qua Sinubus hisce adhærent, constat eam textura lacertorum falcis multò compactiorem esse; ob quam crassitiem neque vasis, & glandulis locus, neque commercium patet: quod ideò à natura factum reor, ne, si Interseptalaxiora, & minùs firma alicubi existerent, ab insidente continuo ponderosissima cerebri mole grauata, aut reciproca contractionis, & relaxationis vi tandem enervata, debitò citiùs conciderent; & glandularum (si quæ adessent) vasorumque munus obrueretur.

Hanc etiam ob causam interior Sinus Longitudinalis textura validioribus chordis, valvulis, & processibus membranosis (ad lateralium Sinuum differentiam) construitur;  
instru-



instrumentis videlicet cruori intra hunc Sinum retardando, indeque fortius exprimendo inservientibus; ut alternis turgentiae, ac compressionis nixibus intentum à natura secretionis opus, pro re nata, succedat; praesertim in commodum fluidi, quod per substratas glandulas excernendum est, ut infra constabit.

Rectius ergò in superna Cerebri parte, scilicet supra utrumque ejusdem limbum, Sinus longitudinalis tractui proximè incumbentem, insident glandulae; quae, cum à nullo superstrato gravi corpore premantur, liberiùs humorem proprium effundere, atque excretoria vasa absque rupturae, aut strangulationis, ut ita dicam, metu quaquaversum producere possunt.

Ex praefatis glandulis innumera emergunt fila, quae totidem sunt excretoria vascula, quorum existentiam olim non levi conjectura affecutus fueram, tandem verò per autopsiam,  
sen-

ſenſibus percepi: hæc enim lymphatica à Dura Meninge ſanguiferis intimè associata, & implicata, in Piam Meningem implantantur, huicque firmiſſimè adhæreſcunt, ope non modò ſanguiferorum, ſed plurium etiam fibrarum à Dura Meninge provenientium; quæ proculdubio vaſorum nexum, & ſtabilitatem confirmant, ne in motibus tam facilè dirumpantur.

Per has verò fibras, & vaſa ita invicem junguntur Meninges, ut, ſi hunc ipſarum nexum auferre tentaveris, id niſi diligentiffimè inſtituatur, Pia facillimè divellatur, intactis remanentibus vaſis: ſi verò cautè proceſſeris, Piam Meningem manu leviter deprimendo, lacerantur duntaxat fibræ, & vaſa; ex quorum officiis diverſas, & diſtinctas liquoris guttulas decidere conſpicies; cruoris ſcilicet, & lymphæ pellucidæ.

Ut autem hæc commodius obſervetur, cavendum primò in ſeſſione cranii, ne Dura Meninx, quantum fieri

fieri potest, ferrâ lædatur; deindè Cranium ab ipsa attentè diducendum, & si possibile sit, Meninx manu, vel instrumento tenviori versus cerebrum deprimenda, ne ob morbosam adhæSIONEM (si hæc adsit) vel fortem conatum Cranio consentiens, subjecta vasorum connexio priùs, quàm observari possit, divellatur: indè eadem Meninge forcipe circum Cranium, & transversim per medium secta, & paulatim ad Cerebri summitatem inversa, vasorum nexus, diversitas, & reliqua hæctenus exposita, planè manifestantur.

An omnia lymphatica sub præfatis vasorum plexibus contineantur, non sine ratione dubitaveram, cum sapissimè in tollendo nexu Duræ cum Pia Meninge, glandulæ quamplurimæ huic quoque innixæ, ac veluti connatæ animadvertantur; quæ propter ex quodam insuper rore, ac veluti albisissima nebula, qua semperpersa remanet Pia Meninx, fortiori conjectura, ultra

ultra notatas insertiones, & ligaturas, minima pariter lymphatica inferi deducebam. Attentiùs ergò investigando extra expositam vasorum complicationem, unam ab altera lentè diducendo membranam, adverti utramque simul ulteriùs connecti veluti per tenvia quædam filamenta, quæ à glandulis Duræ Meningis emergunt. Hæc ad certam vsque mensuram protrahuntur, deindè fracta, appositum digiti apicem limpidò humore perfundunt.

Horum lymphaticorum progressum, intra Piam Meningem saltem, non valde arduum est assequi; quippe canalium sanguifluorum lateribus hærendo, ipsorum commeatum, & divaricationes quascumque minimas sequuntur: apparent enim, & in superficie Piæ Meningis, & in ejusdem separatis portionibus, cerebri anfractus (quos non mediocriter humectant) vestientibus; hæ namque lumini objectæ vasa exilissima albi-

cantia, Meningis substantiæ non parum dissimilia, sanguiferis ut plurimum implicita exhibent.

Inter innumera Capita, quæ dissectui, unum in Archiospitali Sancti Spiritus in Saxia reperi, cujus in valde firma Pia Meninge, hæc vasa conspicua satis occurrebant: itaque ipsorum lymphaticorum alterum tenuissimò lanceolæ cuspide adaperui, quod, præsentibus multis Anatomix Ministris, styli per quàm minuti portionem, exiguam tamen, admittebat. Memini in Apoplecticis quibusdam, quorum Cerebrum lymp̃ha scatebat, Piam Meningem triplò naturali crassiores non semel observasse, cui, & demptus erat omnis ferè vasorum nexus, & pellucidæ admodum hydatides hinc indè inspergebantur, tot veluti exiguæ lymphaticorum Varices.

Quamvis ubicumque Pia Meninx Cerebrum investit, ejusque corticales gyros, interstitia, atque parietes

tes falci contiguos ad corpus usque callosum pervadit, lymphaticis semper associetur, hæc tamen, an Cerebri medullarem substantiam penetrant, quavis vel adhibita diligentia, nondum attingi: probabile tantummodò mihi videtur varias Cerebri protuberantias, atque cavitates ea perreptare posse, donec in proprium alveum lympham exonerent. Idcirco haud omnimodè certum puto hallucinatos esse magni nominis Viros, Bohnium, & alios, qui eadem in Cerebro observasse testantur: invento quippe eorundem exortu, non absolum reor progressum, & finem reperiri. Et nuper Dn. Bartholomæus Simoncellus, oculatissimus Anatomicus Romanus, in Theatro Sapientiæ lymphaticum super protuberantias Striatus serpens mihi ostendit.

Heertodt pariter in Crocolog. pag. 282., citatus ab Ettmullero in Collegio practico, refert in Puero, Hydro-

cephalo mortuo, se vidisse lymphatica cerebri partim turgida, partim rupta. Ex quibus sanè observationibus conijcere possumus, lymphatica, quæ in Cerebro à tot Illustribus AnatOMICIS adnotata sunt, propagines esse illorum, quæ nos à Dura per Piam Meningem produci deteximus; quod quidem eo magis inconcussum apparet, quòd à nemine, ex Cerebri lymphaticorum Patronis, horum vasorum origo indicetur.

Ex hætenùs recensitis satis inferri posse crediderim Meningis glandulas ad separandum humorem aliquem à toto sanguine diversum, cæterarum more, comparatas esse; in quem autem finem secretus ab iisdem humor, seu lympa; à natura determinari possit, non æquè patet: statim ac enim glandularum accervos ad latera primi Sinus detexi, hæsitare cœpi, an in hujus gratiam constitutæ forent, ad refluxum nempe sanguinem venosum magis fluxilem red-

reddendum, tollendumque mortiferae coagulationis periculum.

Hoc dubii genus sicuti non à ratione alienum videbatur, ita non tantum momenti habere comperi, perspectis arteriolis vividius fluidum in hunc Sinum derivantibus, munusque mox indicatum abundanter explentibus, & detecta lymphaticorum insertione, atque cursu ad Cerebrum, non verò ad Sinum conversis; nullum enim, quod hujus cavitatem respiciat in glandularum dorso excretorij, aut orificij vestigium apparet, etiam si ab involuente propria membrana eadem, vi aliqua, denudentur.

Non minus necessarium existimaveram investigare, an inter primum, & secundum Duræ Meningis fibrosum stratum disseminarentur lymphatica, quæ tandem in interiorem ejus superficiem humorem extillarent, ad motuum perennitatem juvandam. Quamvis hoc non improbabile, immò dari fortasse concedam; fateor ta-



men hujusmodi lymphaticorum penetrationem adhuc non esse assequutum, quam liquido per eadem transfluente, quin, & Meningum robori officere potius dubitavi.

Probè insuper linteo deterfa interiori Meningis superficie, & digito extra memoratam lymphaticorum insertionem compressa, vel nihil humoris erumpit, aut, si quidquam exsudat, morbosum est, & ab interstitijs fibrarum antea imbibitarum, potius, quàm ab excretorio aliquo, promanare videtur: suspicor enim, quòd si hac in superficie excretoria aliqua adessent, præ fibrarum densitate, & contractura quodammodo strangulari possent, ut superius innui.

Sed quoniam constat interiorem Duræ Meningis superficiem humore aliquo madescere; & ipsum gelatinosum in Cadauerum, Senum præsertim, sectionibus ex morbo recolligi (quod inter plures testatur Famigeratissimus Malpighius in consiliis) quin  
&

& tale liquidum in Cerebri ventriculis stagnare deprehendimus, non modò in Hydrocephalo, plerisque Apoplecticis &c. sed & in Epilepticorum compluribus, multisque convulsivo capitis affectu interemptis; aliquod commercium inter has partes, & lympham, ex naturæ pariter instituto, reperiri, necessarium apparet; cujus rationem investigare nonnisi coniectura, ut ità dicam, palpabili valemus: verosimile namque videtur lymphatica Pia Meningem alluentia rorem quendam tenuissimum continuò exhalare, quo utraque ejus superficie, primò in proprium commodum madefacta, Duræ pariter Meningi ad contactum vsque accedenti, & subjecto Cerebri Cortici subsidium præbeat; ne ista, præ jugi contractione exarescat (uti etiam Sagacissimus Valsalva in suo elegantissimo, de Aure Humana, tractatu, nuper Bononiæ edito, & humanissimè ad me misso, quodammodo visus est indicare) cortici ve-

rò, ne compressionum ictibus, ipsius oscula & exsiccentur, & aliquando occludantur, maxima cum suorum munerum jactura.

Probabile est etiam idem evenire, in Cerebri Ventriculis, Corporibus Striatis, cæterisque ejusdem concamerationibus, atque protuberantiis, quas præfatus liquor irrigare potest, aut debet, ne ab aere. (si quidpiam illuc penetret) aut à collisu in morbosam siccitatem redigantur.

Rationi insuper consonum videtur ad nares internas, & quòcumque ad insculptas Cranio cavitates proximè extenditur Dura Meninx, hujusmodi humoris portionem profundi; sicut citatus Valsalva pag. 39. §. 15. ad internam Tympani membranam à Dura Meninge proveniente, liquidum istud derivare advertit: Auctoris verba sunt. *Tympani hucusque descripti parietes quodam aqueo humore irrigantur, à membrana eosdem vestiente probabiliter profecto; cum hac sit, ut scriptum*

*tum fuit, Dura Matris elongatio &c.*

Donec expositum fluidum intra naturæ limites constiterit, quidquid ab ipso irrigatur intrâ, & extrâ cranium, rectè procul dubio procedet; quòd si verò ipsum quacumque ex causa exuperare, vel alterari contingat; quidnam morbosum inde pariter non eveniet? Fieri enim potest, ut sanguis materiam lymphæ suppeditet ichorosam, atque erodentem, quæ tenvium ejus vasorum tunicæ propè glandularum, & Piæ Meningis insertionem, vel longè ab ista, quomodolibet lacerentur; aut torpidam nimis, & opprimentem, canaliculis distendendis, diffringendisve idoneam, ut in Apoplecticis supra notatum est; aut debitò uberiores, quàm à vasis devehì, vel resumì liberè possit; aut mille aliis modis noxium glandulis humorem dispenset: quibus quidem vitijs, quid non mali imminere verendum, aut ominari non liceat miseris ægrotantibus?

Unum

Unum adnectere placet exemplum (quod erit instar omnium) ex Clarissimi Malpighii consilijs depromptum, quo non modò recens allatâ doctrina, verùm etiam quidquid aliàs de Meningum usibus enunciamus, & deinceps dicturi sumus, adamussim confirmare videtur; dum inter varias Epilepsiæ causas lympham quandoque morbosam assignat, his verbis. *Contingit autem (loquitur de Epilepsia) morbosa hæc affectio ex stagnatione lymphæ circà Cerebri membranas, ut ex cadaverum sectionibus patet: hæc amissò motu acida reddita irritationem in Meningibus parit, quæ contractæ cerebrum comprimunt, unde violenta succi nervei expressio subsequitur, indeque involuntaria musculorum contractio &c.* Quæ fanè verba mox detectæ lymphæ scaturigini, Meningum fabricæ, & facultatibus nunquam meliùs aptari possunt.

Dum hæc scribebam repentè, è vis sublatuſ est Eminentissimus, ac  
Reve-

Reverendissimus Vrbanus Cardinalis Sacchettus sexagenario major , qui devia Podagra Epilepticus evaserat , & sedula curandi methodo , præsertim vini abstinentia, sex vltra annos supervixerat . In hujus dextra corticali cerebri parte versùs occiput, insignis ovi Columbini molem adæquans inventa est hydatis , quæ construi videbatur ex ipsâmet Pia Meninge , ejusdem dilatatis intempestivè lymphaticis ; quod ad oculum veniebat ex liquido intùs contento ; erat enim lymphâ partim subtilis , & flava , partim in crassam veluti gelatinam conversa ; ubi quod mirabilius apparuit , id certè fuit , ut istius folliculi basis , cortex nempè Cerebri, ad talem resistantem consistentiam devenit , quæ planè Scirrhusa videretur. Ut nulli dubium vel per Pathologiam esse possit , quin supra cerebrum , atque intra Piam Meningem lymphatica perreptent .

Hujus extispicium Principis , pro  
sua

sua humanitate largitus est, Vir sanè omni præconio dignus, Perस्पicacissimus Lancisius noster, qui servandæ illius valetudini præfuit, & Cadaveris dissectioni sua, qua solet, sedulitate, ac solertia interfuit.

Lympha præfata non modò sua fluiditate, atque pondere ab apice Cerebri deorsum fertur; verùm priorum canalium, & Piæ Meningis vi contractiva sollicitatur, & potissimum à circumprimente Dura Meninge; cujus quidem mutuus accessus, & recessus ad Canales moderatus excitatur, ut fluidi iusta mensura, & motus promoveatur, atque conservetur, non autem pessum eat unquam. Quòd si ergò hujus Meningis Elater præter naturam enervetur, aut intendatur, morbi, quos jam recensuimus (diversa licèt ratione) evenient facilè; in priori quidem casu Senibus, & effœtis; in secundo verò Epilepticis quibusdam, Phræneticis, Maniacis, & consimilibus affectis.

Inter

Inter veteres Anatomicos advertit quoque Vesalius, cap. de Dura Meninge, hujus interiorem superficiem aqueo humore longè magis, quàm exteriorem perfundi: quod sicut verum experientia demonstrat; ità undenam ad exteriorem hujusce Membranæ corticem humor ille derivetur, arduum est pro nunc determinare; Cum nec glandularum, nec Lymphaticorum vestigia in convexa, ista superficie appareant; etsi pauculas glandulas infra Coronalis futuræ adhæSIONem prominere aliquoties conspexerim, eas tamen ad superius recensitas pertinere dubitavi.

Hæc sunt, Præses Meritissime, quæ de re nova, nec parum gravi, brevioribus quàm potui absoluta, tibi consecrare volui; non eo potissimum ductus favore (quo etiam ab Arcadum, & Physiocriticorum Famigeratissimis Coetibus devincor) quòd me tot Illustrium Virorum Academiæ Cæsareo-Leopoldinæ Sodalem, decoro nimis  
titu.



titulo, constitueris; sed ob eam, quæ ex tuo Penu promanat, Inclytam Virtutem, ac singularem, in hac præsertim Arte nostra, peritiam; cujus tanta est apud me Auctoritas, ut nihil ampliùs de his meis scriptis, quàm quod tuis arrideat placitis, sentiendum existimem. Si quid ergò in hac Epistola naturæ minùs consonum judicaveris, amicè castiga; sin aliter, bono excipias animo, tuoque in sinu tutò, ac humanissimè foveas rogo; non enim alienos, sed proprios labores, qualescunque sint, offerre curavi. Vale Naturalis scientiæ Decus, & Fautor, meque perpetuò ama.

Romæ decimo Kalendas Majas.


*Tibi Addictissimum, atque  
Obsequentissimum.*

Antonium Pacchionum,

1-21 14

30

his expan



(31)  
FIGURARUM EXPLICATIO.

*Figura Prima.*

**E**Xhibet Tres Majores Duræ Meningis Humanæ Sinus, secundum longitudinem in dorso, Cranium respiciente, dissectos; quorum in interna facie unico intuitu apparent Membranosi Processus, Chordæ Villisianæ, & Glandulæ Nostræ nuper detectæ, quæ sub præfatis Processibus, sive Membranosis expansionibus latent in toto Sinu Longitudinalis tractu. In exposita autem figura posterior hujus Sinus pars ideò non fuit denudata, ne repetitis frustra iconismis, horum copia Epistolæ extensionem superaret: indicasse namque sufficit Glandulas sub his quoque expansionibus delitescere.

Hæc porrò figura ex Dura Meninge per diutina plurium hebdomadarum in aceto macerationem incrassata deprompta fuit, ut singula à Pictore delineanda conspicua magis evaderent, & faciliùs exprimerentur, sicuti ad vivum factum fuit.

Animadvertendum est pariter Glandulas in Sinu Longitudinali inæqualiter ex maceratione tumefactas, alias quoque præ aliis crassiores, & figura penè diversas repræsentari; cum tamen in naturali statu mole, & forma æquales esse consueverint, sicuti in Epistola descriptæ fuerunt. Minimæ verò Glandulæ, quæ in hac eadem figura insculptæ conspiciuntur, illis omninò similes sunt, quæ in Meningibus, nulla arte, aut morbo alteratis reperiuntur.

A. Sinus Longitudinalis pars anterior parumper inversa, & complicata.

B. Ejusdem pars posterior.

c.c.c.c.c.c. Latere Sinus diducta partim inversa, partim in posteriori parte d.d. naturali in situ relicta; ubi Sinus propriam ostendit latitudinem à membranosis expansionibus non denudatus.

Mem-

d.d.d. Membranosa expansiones cum suis plicis, quæ in hac Meninge incrassata conspicuæ multũ evaserunt.

e.e. Sinus Portiones semidenudatæ.

2.2.2.2. Specimina Chordarum Villisii; quarum pleræque sub Membranosa Expansione e.e.d.d. adhuc delitescent.

3.3.3.3.3.3. Glandulæ conglobatæ in lateribus Primi Sinus racematim reconditæ: quamvis autem in hac figura ipsarum nonnullæ huc illuc disseminatæ represententur, hoc tamen secundum naturam semper non est, si d. ut plurimum accidit, dum eadem a circumvestiente membranula denudantur: facili enim, si meninx præsertim prius emollita fuerit, ab invicem discedunt. Glandulæ hic tantummodò dorsum visui exhibent, cum in opposita interiori parte Lymphatica ad Piam Meningem emittant.

f. Quarti Sinus Orificium in laterales hians.

g.g.g.g. Sinuum lateralium parietes diducti, ut ipsorum interior facies clariùs demonstraretur.

h.h. Ipsorum extrema abscissa antequam in jugulares inclinare incipiant.

i.i.i.i. Chordæ Villisianæ à membranosis expansionibus liberatæ.

## FIGURA SECUNDA.

**O** Stendit eam Sinus Longitudinalis Portionem, ubi valvulæ ubiores ut plurimum reperiuntur. In hac autem Figura tam Sinus, quam valvularum amplitudo, vix naturalem excedit statum.

a.a.a.a. Sinus resecti latera diducta.

b.b.b. Minores Cellulæ laterales, quæ sanguinem intra Sinum admittunt.

c.c.c. Cellulæ majores valvulosæ in centro Sinus constitæ, quarum orificia se mutuò respiciunt.

d.d. Foreolæ impervie.

Iconismorum Explicatorum.

F I N I S.

1865



MC

